

廬陵宋丞相信國公文忠烈先生全集卷之十五

十九世孫攀丹男

邑庠大學

生光

斗

孫克漢編輯

宋少保右丞相兼樞密使信國公文山先生紀年錄

正文乃公獄中手書附歸全文集註雜取宋禮部侍郎鄧光薦中甫所撰丞相傳附傳海上錄

宋太史氏管發國寶至元間經進甲戌乙亥丙子丁丑四年野史平慶安刊行伯顏丞相平宋錄參之公所著指南前後錄集杜句詩前後卷旁采先友遺老話舊事蹟列疏各年之下

丙申 宋理宗端平三年

予以五月二日子時生大父夢予騰紫雲而上命名雲孫既長朋友字曰天祥後以字貢于鄉字之者改曰履善理宗覽對策見其名曰此天之祥乃宋之瑞也朋友遂又字之曰宋瑞而通稱之

廬陵文氏來自成都公六世祖炳然居永和鎮

五世祖正中徙富田曾祖安世贈太僕卿公
大父時用贈太傅永國公父儀字士表人稱爲
革齋先生贈太師惠國公母曾氏齊魏國夫人

丁酉 宋理宗嘉熙元年 庚子嘉熙四年

辛丑 宋理宗淳祐元年 壬子淳祐十二年

癸丑 宋理宗寶祐元年

甲寅 宋理宗寶祐二年

是歲公夢召至帝所帝震怒責其不孝公哀訴
以臣實孝帝曰人言卿不孝卿言卿孝賜以金
錢四遣去公出門而震雷欲擊之自嘆曰幸免

不孝之罪而又不免雷擊驚覺汗如雨後一舉登第而有父喪但未解四金錢爲何義

乙卯

寶祐三年

甲是歲大比以字舉郡貢士弟璧同舉冬俱赴省侍父革齋先生行予旣以字爲名字之者旣曰履善提舉知郡李廸舉送

丁酉革齋先生與弟書曰道由玉山遇吳僧精長男曰此卽必爲一代之偉人然非一家之福也

丙辰

寶祐四年

二月朔禮部開榜中正奏名弟璧同登及大廷試

策有司寘予第五理宗皇帝覽三對親擢爲第一
臨軒唱名蓋五月二十四日也時革齋先生卧病
客邸予自期集所請朝假侍湯藥二十八日革齋
先生棄世天府治喪榜下士資送道路費粗給兄
弟卽日扶護還里以君子不家於喪沿途餽送並
不受

丁巳

寶祐五年

九月塋革齋先生

戊午

寶祐六年

二月從吉時丞相丁大全用事或勸通書者予曰
仕如其汲汲耶郡侯欲爲言于朝除初官力辭

謝得止

已未 宋理宗開慶元年

五月臨軒策士旨差簽書寧海軍節度判官廳公
事朝廷檢會照格授承事郎予聞命辭免乞行進
士門謝禮旨令朝謝訖之任九月入京時江上有
變吳丞相潛再相初入都知董宋臣主遷幸議京
師洶洶予門謝訖即上疏乞斬董宋臣以一人心
以安社稷建明倣方鎮建守就團結抽兵破資格
用人數事書奏不報還里

舊例三魁唱名罷賜袍笏謝恩入幕賜御饌進

謝恩詩出賜席帽於闕門上馬迎入其集元
名狀元局官給錢物供張皂隸等於此聚同年
待賓客刊題名小錄賜聞喜宴進謝宴詩如此
者一月然後率榜下士詣闕謝恩謂之門謝門
謝後授初階內狀元授承事郎簽書某軍節度
判官廳公事至後一科放進士榜則前一科狀
元召入爲秘書省正字名曰對花召

庚申 宋理宗景定元年

二月差簽書鎮南軍節度判官廳公事辭免乞祠
祿旨差主管建昌軍仙都觀

辛酉

景定二年

十月除秘書省正字時賈丞相似道當國年餘頗訝不通名及除入館得予書舉張師德兩及吾門故事始重嘉歎

誥詞曰倫魁登瀛故事也然始進大率以虛名既久乃知其實踐爾則異於是初以遠士奉董庄之對繼以卑官上梅福之書天下誦其言高其風知爾素志不在溫飽麟臺之召其來何遲語有云居大名難又云保晚節難爾其厚養而審察之使輿

論翕然曰朕所親擢敢言之士可

劉克莊行

四月供正字職尋兼景獻府教授五月充殿試考官進校書郎誥詞曰新進士唱第前舉首必召故事也爾以陟帖之故稽登瀛之擢一旦來歸如麟獲泰時鳳集阿閣甫縉黃本俄映青藜在他人爲速在爾爲晚矣人之不可及者年也不磨者名也至哉天下樂者書也朕將老汝之才而極其用焉

癸亥出閣題 景定四年

正月除著作佐郎二月兼權刑部郎官刑部事最繁重居官者率受成於吏號清流者尤所不屑爲

予鈎考裁決晝夜精力不倦吏不能欺懾服焉八月以董宋臣覆出爲都知上疏論其惡不報束擔將出閔丞相遣人謂公不可差知瑞州十一月赴郡十二月迎親就養郡兵火後瘡痍乍復予撫以寬惠鎮以廉靜郡兵素驕取其桀黠寘之法張布綱紀上下肅然於交承外積緡錢萬創便民庫去之日填兵出前窠名爲楮百萬有奇遺愛在民以益不忘

甲子 景定五年

十月召赴行在尋除禮部郎官十一月除江西提

乙丑 宋度宗咸淳元年

二月就瑞州交割提刑職事時大赦後推廣德意
全省居多惟平寇扶楮稍振風采四月行部至吉
州太和縣伯祖母梁夫人歿予父所生母也申解
官承心制間臺臣黃萬石以不職論罷是歲闢
文山

臨江城中金地坊銀匠陳見負閨會過于市者
歎曰我等困苦止欠此馱耳翼早盜殺負閨會
人慧力寺後山中捕司跡盜急市荷擔行鬻饌

餌者以所聞陳語告捕司鞠陳筆楚誣服將受
刑辭其母曰爲子不能終養必宿寃債無可說
者望吾母焚紙錢於吾死處告土神乞指引我
到盜殺人處又焚紙錢於盜殺人處告土神乞
指引我到殺人正賊之家母如其言後月餘母
夢子告曰謝母已得正賊乃府衙後李某家所
得闕會具在暗閣上竹籠內於吾死後止用訖
闕會買牲酒賽謝神福內覆紙單籠上用草爲
遮蓋塵灰積滿一二日文提刑到請母爲陳訴
越數日公到陳母乞屏左右持素紙以所夢訴

負閨會人死推司及元捕入償陳死官贍養陳
母終身此趙君厚言也

丙寅

咸淳二年

丙寅戊戌庚戌丙子長男道生生

丁卯

咸淳三年

丁卯壬寅甲午丙寅次男佛生生二月女柳生三
月女環生九月除尚左郎官辭免不允十二月赴
闕供職誥詞曰蘇軾有云仁宗皇帝在位最久得
人最盛進士高科類至顯位我理宗享國庶幾仁

祖取士之數却又夥焉當時褻然之選今其存者
無不登進獨爾以陳情之表讀禮之文淹恤在外
尚遲嚮用夫風之積不厚則其負大翼無力若爾
之植立不凡非特以高科也而至_三世厥裁則其
滋長也孰禦尚左高於卽位其以是起家方天之
休敬之哉可馮夢得行

戊辰

咸淳四年

正月兼學士院權直兼國史院編修官實錄院檢
討官是月臺臣黃鑄奏免所居官冬至除福建提
刑臺臣陳懋欽奏寢新命

四月差知寧國府辭免不允十一月領府事府極
彫弊始至爬梳條理曠然無事寧國爲郡居上流
斗絕稅務無所取辦則椎剝爲民害予奏罷之別
取郡計以補課額百姓歡舞去後爭醵錢立祠
先是乙卯春公家趨城三十里曰冷水坑旅店
胡翁夜夢門外巨石有龍蛻爪其上夢甚著覺
而異之昧爽卽擁帚掃除石驗所夢已而公至
則坐于石更屢翁言早寒願飯而去詞意甚勤
公問故以夢告且曰他日必富貴願垂憐我家

公諾焉由是公家人往還經從必飯其家歲時
翁嫗至公家必優贈與至是公載家寧國弭任
歸午飯胡店胡以宿諾請公笑曰諸擔中任擇
取其一胡屢謝不敢則擇取一擔以告公令衆
啓擔視之則扇也公曰此遠方土宜爲鄉里親
友餽者汝無用焉命衆作時值以其直與之蓋
胡以公五馬貴如他人皆輜重充溢不知公行
橐固枵然是以任其自擇無嫌也公之子孫過
之胡之子孫仍奔走迎送不倦公家亦時優恤
之一夢之吉乃纏綿受實惠異哉此胡老之言

庚午

咸淳六年

正月朔除軍器監兼右司辭免不允四月供監職
免兼右司尋兼崇政殿說書兼學士院權直兼玉
牒所檢討官會平章賈似道託疾歸紹興乞致仕
旨令學士院降詔不允賈有要君之志予當制裁
之以正義時內制相承皆呈藁當國改竄惟命重
失王言之體予直道而行遂忤賈意七月除秘書
少監兼職依舊臺臣張志立奏免所居官

辛未

咸淳七年